

per sier Zuan Dolfin avogador extraordinario, per menar sier Domenego Griti comandato in pena di ducati 10. Vi vene il Principe, come fu *etiam* l'altra volta. Et mandati zoso tutti quelli non meteano balota et li cazadi, dito sier Zuan Dolfin andò in renga, dicendo, per suo exordio, queste parole . . .

Et poi intrò nel caso, dicendo non si vardasse a pregierie fate per sier Domenego Griti qu. sier Nicolò suo reo, indegno di esser nel consortio di zentilhomeni; qual monstrerà lui aver tolto ducati 2810, de li qual questo Setembrio, insieme con li compagni, li sententiono ducati 1250 e la pena ducati 160 di 25 per 100, justa le leze, et portò contanti zereha ducati 800, e il resto pagò di danari di Camerlengi a ducati 36 il cento, come il Colegio a di 7 Dezembrio contentò. Oltra di questi, questo ha intachà di ducati 500 in nome di Lucha Burato. *Item*, lire 40 di sier Jacomo Alvisè Contarini tolti contra il suo voler, *licet* li habi poi restituidi; poi quella partida di ducati 200 disse tolse di sier Jacomo Trivixan qu. sier Silvestro. Disse che sier Michiel Morexini so' parente, l'ha fata, però non ne parla; ma ben una nova di sier Etor Trun, fo vicesoracomito, e fe' lezer una deposition di sier Francesco Trun so' fradelo, qual è di ducati 70 tolti in lui a li Camerlengi; siehè, oltra l'intacho sententiato, trova in nomi supositi ducati 504, 8, 18 l'ha 'uto a li Camerlengi, e la pena dil quarto ducati 126, summa ducati 631, 11. 3. *Item*, in nome di sier Vetor Griti ducati 340; in nome di dona Polisenà Griti so' madre, ducati 155 e le pene; et di Lorenzo Sartorello, et uno da la Costa, ducati 160, e fe' zertificar, per i rasonati, aver intachato questi danari etc.; et in nome di sier Zuan Beneto ducati 240; summa ducati 1258. Poi intachà dil suo imprestado di Gran Consejo ducati 150, et pagatosi. Essendo al dazio dil vin; fato lezer una vacheta di sier Zuan Emo, fo camerlengo di comun, et mostrò le partide etc.: dicendo molte autorità, exortando a la retention. Et il Principe l'aiutò, dicendo qualche parola in suo favor. Et venuto zoso, fe' lezer la parte che l' meteva; la copia noterò qui avanti. Hor sier Francesco Bolani, l'avogador, andò suso, et con colora contra sier Zuan Dolfin, che non doveva meter de retenir per 5 raxon. La prima *ratione legis*; *secunda*: quia non est acusatio aliqua; *3.º obstat rex judicata*; quarto questo non si pol far per l'ordine di l'avogador; quinto è imbochado. Et *confuse* disse, ch'è la leze presa nel Consejo di X, che tutti quelli in termene de zorni 10 se andavano acusar etc. che avesse intachado, costui

è andà et à pagà et mò voleno meter de retenir; poi non è quarela, ni inquisition se pol far, ni è provà alcuna cossa. *Demum*, loro hanno sententià resermandosi a far altre sententie, et si se prende de retenir, sarà riformato etc. cargandolo doveva retenir Zuan Trivixan scrivàn; et che lui non voleva esser più Avogador, ma ben il Dolfin, qual la seconda volta era cazudo, et la prima fatto con danari; con altre parole; et che la parte di retention non poria star pezo, facendola lezer e a parte a parte disputando. Et venuto zoso, andò la parte di retenir: 22 non sincere, 51 de no, . . . de si, e fu presa.

Poi fo posto molte parte; ma non leto alcuna letera, perchè quelli non meteano ballota erano stà mandati zoso.

Fu posto, per li Savii ai ordeni, una letera al Provedador di l'armada, vadi a Schyros, formi processi per quelli 900 aspri tolto ha quel sudito del Signor turco, e trovando la verità, fazi restituir, et hãbi libertà di mandar li delinquenti, sia chi si voja, rectori nostri di l'Arzipelago, di qual habi autorità di synico, excepto di Candia, in questa terra, et li processi a li Avogadori. *Item*, per la galia di Alexandria naufragada, vadi con una altra galia capitana al viazo aziò sia sicura; con altre clausole *ut in parte*, molto longa; et subito li manderemo sovenzion per lui e le do galie l'ha etc. Ave 3 di no, et fu presa.

Fu posto, per li Savii tutti, atento li dani fatti in Dalmatia, come per letere di rectori di Traù e Spalato apar, et per li oratori venuti de qui, sia mandà presenti al sanzacho di Bosina per valuta di ducati 200, come parerà al Colegio, al sanzacho dil . . . per ducati 150, over al suo locotenente. *Item*, sia mandati stratioti 25 per luogo, *videlicet* Traù, Spalato e Sibinico, da esser pagati a la camera di Vizenza a page 8 a l'anno. Et il Consejo mormorò erano pochi, et conzorno 50 cavali di stratioti per luogo; et fu presa.

Fu posto, per li Consieri, libertà a le monache de la Celestia vender una sua caxa a San Marzilian paga di fitto ducati 9, per ducati 200 da esser quelli investidi, et fu presa: 142, 16, 4.

Fu posto, per li Consieri, scriver in corte per la 20 confirmation dil maestro Antonio Sapa piovan di San Lucha, et per pre' Sebastian di Sebastiani piovan di San Rafael di novo creadi, et fu presa: 148, 2.

Fu posto, per li Consieri e Cai di XL, poi leto una suplication di Paulo Carazolo capo di stratioti, qual nara molte prodeze fate e lui aver preso Francesco Beraldo e il capitano Caravajal, et per esser